

ԵՐԻՏԱՍԱՐԴԱԿԱՆ ՆԵՐԿԱՅԱՑՈՒՑՉԱԿԱՆ ՀԱՎԱՔ ՄԱՅՐ ԱԹՈՌՒ ՍՈՒՐԲ ԷԶՄԻԱԾՆՈՒՄ

ՄԱՅՐ ԱԹՈՌՒ ՀՈՎԱՆՈՒ ՆԵՐՔՈ ՀԻՄՆՎՈՒՄ Է ՀԱՅ ԵԿԵՂԵՑԱՍԵՐ
ԵՐԻՏԱՍԱՐԴԱՑ ԿԱԶՄԱԿԵՐՊՈՒԹՅՈՒՆ

Մարտի 6-ին Մայր Աթոռ Սուրբ Էջմիածնում Ն.Ս.Օ.Տ.Տ. Գաբեգին Բ Ծայրագույն Պատրիարք և Ամենայն Հայոց Կաթողիկոսի օրհնությամբ և նախագահությամբ ԱՄՆ հայոց Արևմտյան թեմի առաջնորդ Գերաշնորհ Տ. Հովնան արքեպիսկոպոս Տերտերյանի տեղի ունեցավ երիտասարդական ներկայացուցչական հավաք:

Հավաքի նպատակն էր Մայր Աթոռ Սուրբ Էջմիածնի հովանու ներքո հիմնադրել Համազգային հայ եկեղեցասեր երիտասարդաց կազմակերպություն, որի կենտրոնական գրասենյակը գտնվելու է Մայր Աթոռ Սուրբ Էջմիածնում: Ամենայն Հայոց Կաթողիկոսի Հայրապետական տնօրինությամբ կազմակերպության ստեղծման աշխատանքները համակարգում է Տ. Հովնան արքեպիսկոպոս Տերտերյանը, իսկ Սրբազանին օգնական է նշանակվել Մայր Աթոռի միաբան Տ. Նշան աբեղա Պետրոսյանը:


Ներկայացուցչական հավաքին մասնակցում են Գևորգյան Հոգևոր Ճեմարանի և Վազգենյան Հոգևոր Դպրանոցի սաներ, Մայր Աթոռի երիտասարդ միաբաններ, Կոստանդնուպոլսի հայոց Պատրիարքության ներկայացուցիչներ, Հայաստանի, Արցախի և աշխարհասփյուռ գրեթե բոլոր թեմերից ժամանած շուրջ յոթանասուն երիտասարդներ:

Ժողովի աշխատանքներն սկսվեցին Տերունական աղոթքով և «Սուրբ Աստուած» շարականի երգեցողությամբ, ապա հավաքի բացման խոսքով երիտասարդներին դիմեց Տ. Հովնան արքեպիսկոպոս Տերտերյանը: «Այս օրը ձեր կյանքի մեջ պատմական պետք է համարեք, որովհետև առաջին անգամ պաշտոնապես հիմք է դրվում Հայ եկեղեցասեր երիտասարդաց կազմակերպության: Թեև առանձին թեմական կառույցներից ներս երիտասարդաց միություններ կան, սակայն այսօրվա ժողովի նպատակն է ստեղծել համազգային երիտասարդական մի կառույց, որը պետք է առաջնորդվի մեկ ընդհանուր կանոնադրությամբ և համակարգված գործի Մայր Աթոռ Սուրբ Էջմիածնի հովանու ներքո», - ասաց Սրբազան Հայրն իր խոսքում:

Վերհիշելով Քրիստոնեությունը Հայաստանում պետական կրոն հռչակման 1700-ամյա հոբելյանի տոնակատարությունների շրջանակներում ստեղծված Մայր Աթոռի երիտասարդական գրասենյակի գործունեությունը` Հովնան Սրբազանը կարևոր և հրամայական նկատեց երիտասարդների ամբողջական մասնակցությունը Հայաստանյայց Առաքելական Սուրբ Եկեղեցու կյանքին: Սրբազանը հորդորեց ամենքին միմյանցով զորանալ և զորացնել իրենց հոգիներից ներս Աստծու տված կոչումը: «Այս հավաքը պետք է որ մեր կյանքում այլակերպության, փոխակերպման առիթ դառնա, որպեսզի յուրաքանչյուր հանգրվան մեր ծառայության հնարավորություն դառնա դեպի Աստված բարձրանալու», - նշեց Հովնան Սրբազանը:



ԵՐԻՏԱՍԱՐԴԱԿԱՆ ՆԵՐԿԱՅԱՅՈՒՅՉԱԿԱՆ ՆԱՎԱՔԻ ԸՆԹԱՅՔՈՒՄ



Կազմակերպության առաքելության և գործունեության ոլորտների վերաբերյալ քննարկումներից հետո հավաքի մասնակիցներն ընտրեցին Կենտրոնական խորհուրդ, որը, գործադրելով ներկայացուցչական ժողովի որոշումները, կնախապատարաստի Համագային հայ եկեղեցասեր երիտասարդաց կազմակերպության 2008 թ. առաջին պատգամավորական ժողովը: Պատգամավորական ժողովին կներկայացվի նաև ներկայացուցչական հավաքի կողմից կազմած Կազմակերպության կանոնադրության նախագիծը: Մինչ պատգամավորական ժողովը՝ Հայ Եկեղեցու թեմերում կհաստատվեն Հայ եկեղեցասեր երիտասարդաց կազմակերպության գրասենյակներ, տարբեր մայրցամաքներում կգումարվեն շրջանային ենթահանձնախմբերի ժողովներ:

Հավաքի մասնակիցներին Վեհաբանի հարկի ներքո ընդունեց և Հայրապետական իր օրհնությունը փոխանցեց Գարեգին Բ Ամենայն Հայոց Կաթողիկոսը: *«Մեզ համար շատ էական է և կարևոր այս նախաձեռնությունը՝ Հայ Եկեղեցու եկեղեցասեր երիտասարդաց կառույցի ձևավորումը, որն օգտակար և շահեկան պիտի լինի եկեղեցական մեր առաքելության իրականացման գործում: ...Եկեղեցին պետք է կարողանա ներկայություն լինել մեր կյանքի բոլոր ոլորտներում: Դա չի կարող միայն հոգևորականների աշխատանքի շնորհիվ իրականացվել, այլ ավագ և երիտասարդ սերնդի բոլոր հայորդիների աջակցությամբ: ...Երիտասարդների ձայնը պետք է հնչի եկեղեցական մեր կառույցներից ներս, և ձեր շարքերը պիտի ժամանակի մեջ ավելի ընդարձակվեն և համարվեն նոր անդամներով»*, - ասաց Նորին Սրբությունը՝ խոստումնալից և հուսադրող նկատելով ձեռնարկված առաջին քայլերը: Ամենայն Հայոց Կաթողիկոսը կարևոր նկատեց, որ երիտասարդները հաղորդ դառնան եկեղեցական կյանքի խնդիրներին, որպեսզի իրենց գործունեությամբ թե՛ ներկայիս և թե՛ ապագային նպաստեն հոգևոր կյանքի առավել արդյունավետ կազմակերպմանը և առկա խնդիրների լուծմանը:

Վեհափառ Հայրապետը նաև իր գնահատանքը հայտնեց Հովնան Սրբազանին՝ երիտասարդների նկատմամբ ունեցած սիրո և հետևողական ու նախանձախնդիր աշխատանքի համար:

Ներկայացուցչական հավաքին ներկա էր Իտալիայի հայոց հոգևոր հովիվ Ս. Առեն վարդապետ Շահինյանը:

ՄԱՅՐ ԱԹՈՒՆ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ